



**Uunga siunnersuut: Nalunaaquttap aalajangersarneqarnera pillugu Inatsisartut inatsisaata allanngortinneqarneranik Inatsisartut inatsisaat (Nalunaaquttat ingerlaqatigiiffiannut allamut ikaarsaarnaq, aasaanerani nalunaaquttap atorunnaarsinneqarnera)**  
(Siumut gruppi)  
(Siullermeerneqarnera)

Qujanaq Siumumut siunnersuuteqarnerannut.

Siunnersuut pingaarutilinnik marlunnik allannguinerik imaqarput nalunaaquttap aalajangersarneqarnissaanut; nalunaaquttat ingerlaqatigiiffiannut allamut ikaarsaarnaq, 25. marts 2023-imi allanngortitatsinnut ikaarsaarnerusoq aammalu aasaanerani nalunaaquttap atorunnaarsinneqarnera.

Aasaanerani nalunaaquttamut oqaaseqaatissakka aallartissutigilaarlakka.

Kialluunniit qularutigissanngilaa, Demokraatit aasaanerani nalunaaquttap atorunnaarsinneqarnissaanut isumaqataasorujussuunera. Demokraatini isumaqanngilagut, siunertaqartoq nalunaaquttap siuartillugulu utertittarnissaa ukiumut marloriarluni. Sulili apeqqut ammavoq, arlaat pitsaanerussanersoq, nalunaaquttap siunissami aallaaviginissaanut maannakkut aasaanerani nalunaaqutarineqartoq imaluunniit maannakkut ukiuunerani nalunaaqutarineqartoq. Tamanna misissorluarneqartariaqarpoq nunanut allanut ataqatigiissarneqarluni, assigsumik inissisimasunut anguniarlugu, siunissami suleqatigiinnerup pitsaanerpaamik ingerlanneqarnissaa.

Demokraatini naleqqunnerpaatut isigaarput, aasaanerani nalunaaquttap allanngortittarnera peerneqassasoq, EU-mi iliortarneq ilutigalugu, aappaatigulli paasisinnaavarput, EU-mi atorunnaarsinnissaa ajornakusuussasoq, nunat ilaasortaasut isumaqatigiissinnaarpasinnnginnamik. Tassani pingaaruteqarpoq, EU-mi sinniisuunitsinni ineriartorneq malittarilluinnassagippat inissisimanerlu aammalu taakku kingunissai nalilersortillugit. Taanna aaqinneqarsinnaanngippat siunissami ungasippallaanngitsumi, nunatut kisitta iliuuseqartariaqassuugut utaqqiinnarsinnaanngilagummi. Tamannali periarfissani kingullerpaasariaqarpoq, taamaattoqassappallu sukumiisumik inuussutissarsiortut taakkulu kattuffii oqaloqatigineqartariaqarlutik aalajangernerup taamaattup aningaasatigut qanoq kinguneqarsinnaanerata nalilersornissaa siunertaralugu.

Nunatta nalunaaqutarisimasaanut uteqqinnissamut tunngatillugu, paasivarput Demokraatiniit, tamanna naleqqunnersoq pillugu isummat assigiinngitsuusut. Ataqqisorujussuuagut innuttaasut, atsiortitsinerik katersinermi peqataasimasut taamaaliornerminnut isummaminnik annissisinnaasimallutik. Pingaartuuvoq, uagut aalajangiisartutut innuttaasut isumakulunnerat unammillernartorsiornerallu tusarnaassallugit.

Aappaatigut aamma pingaartuuvoq Demokraatinut, inuiaqatigiit ima sinaakkuserneqarsimassasut, nunatsinni inuussutissarsiortut pitsaanerpaanik atugassaqartinneqarnissaat aningaasanik amerlanerpaanik



isertitsinissaminnut. Inuussutissarsiortut pigissaarnerusut qanorluunniit inuiaqatigiinnik pigissaarnerulersitsisarput, atugarissarnissamut periarfissanik pitsangorsaataallutik aammalu namminerisamik naalagaaffinngornissamut toqqammaviussallutik. Tamanna Demokraatini isumaqatigaarput. Aammalumi tusarniaanermi akissutini tiguneqarsimasuni assigiimmik nalunaartoqaqattaarpoq nunatsinni inuussutissarsiortuniit, ajortumik, aningaasatigut kinguneqassasoq nalunaaquttamut atorsimasatsinnut uteqqikkaluarutta.

Tamanna tunngavigalugu ersarissumik oqaatigisariaqarsorinarpoq, siunnersuutip Siumumeersup innuttaasut saaffiginninnerannit tassanilu aamma taakkartorneqartoq atsiornernik katersisimaneq tunngavigineqarsimasut. Oqaatigineqareersutut uagut Demokraatiniit tamanna ataqqisorujussuarput, isumaqarlutali, ilisimatusarnikkut tunngavissaq annikippallaartoq. Allatut oqaatigalugu, Inatsisartuni pisariaqartipparput, isummernissatsinnut tunngavissaq pitsaanerusoq.

Taamaattumik siunnersuutigerusupparput, nalunaaquttamut maannakkut atugarineqartumut ikaarsaariarnermi kingunerinik naliliineq sukumiisoq aallartinneqassasoq. Naliliineq imaqassaaq kinguneri pitsaasut pitsaanngitsullu aammalu innuttaasut, inuussutissarsiortut pisortanilu oqartussat tamarmik akuutinneqassasut.

Demokraatit siunnersuutigerusuppaat, naliliinissamut sinaakkutissat piaarnerpaamik aallartinneqassasut, kisiannili naliliinivik aatsaat aallartinneqassasoq 25. marts 2025 kingorna, nalunaaquttap atukkatta nutaap atuunneraniit ukiut marluk qaangiunneranni.

Siunnersuut taamatut oqaaseqaatitalerlugu ataatsimiititaliami susassaartumi suliareqqitassatut innersuussutigineqarpoq.